

**Parlimen: RT Tidak Sepatutnya Dijadikan Tempat Lahir Rasa Tidak Puas Hati
Bernama
21 Jun, 2012**

KUALA LUMPUR, 21 Jun (Bernama) -- Seorang Anggota Parlimen Khamis mencadangkan agar institusi Rukun Tetangga (RT) tidak dijadikan wadah untuk melahirkan rasa tidak puas hati serta memperbesar-besarkan sesuatu isu yang boleh memecah belah perpaduan dan keharmonian rakyat.

Datuk Idris Haron (BN-Tangga Batu) berkata, "Mungkin tidak keterlaluan jika saya katakan hari ini RT di beberapa lokaliti telah menjadi pelantar untuk sesuatu pihak melahirkan rasa tidak puas hati dan sebagainya.

"Saya khuatir jika kawalan tidak diperkenalkan secara konsisten dalam unit RT, ia akan memecahbelahkan sistem kehidupan masyarakat setempat," katanya ketika membahaskan Rang Undang-Undang Perbekalan Tambahan (2012) 2012 peringkat jawatankuasa pada persidangan Dewan Rakyat hari ini.

Idris turut mencadangkan Pegawai Perpaduan dan Integrasi supaya turun padang dan melihat sendiri operasi RT bagi mendapatkan maklumat secara langsung serta situasi sebenar hingga ke akar umbi.

-- BERNAMA

Hak Cipta Terpelihara © 2012 BERNAMA

Source: <http://www.bernama.com/bernama/v6/bm/newsindex.php?id=674659>